



#### Aktivriege

Jugendriege  
LEichtathleten  
Kutu Knaben

#### Damenriege

Mädchenriege  
Geräteturnen  
Elki - Turnen  
Kutu Mädchen

#### Frauenriege

Volleyball  
Seniorinnen Senioren

#### Männerriege

Faustball

[www.tv-horgen.ch](http://www.tv-horgen.ch)

### Jahresbericht 2023 vo dä Meitliriege

Und scho wieder hämmer es Jahr hinter eus.

Im März hät Jugimeiserschaft i dä Waldegg stattgfunde. Eusi Meitlis händ en Parcour bestritte müesse mit verschiedene Hindernisse. Au d'Jugi und s'Getu sind debi gsi. Für dä Wettkampf hämmer i dä Turnstund alles trainiert, wie Gschiklichkeit, Uusdur, Koordination, Gschwundikeit, genau luege und genau zuelose. Die zwei letsche Pünkt simmer immer no am trainieren. Die stränge Trainings händ sich glohnt, es paar vo eusne Meitlies händ sich chöne en Podestplatz ergattere. S'wichtigste aber, alli händ Freud und Spass gha bim mitmache und das isch super!



Wiiter isches gange mitm trainiere für euse Juspo Wettkampf. Mir händ fliessig i dä Turnhalle verschiedene Diszipline trainiert. Am meiste Ziit und Geduld häts bim Bodeturne und Stufebarre brucht. Aber mitänand hämmer das guet chöne meistere. Und dänn isch dä 20. Mai au scho vor dä Tür gstande. Euse Wettkampftag in Uetikon am See. Uf die 8.00 isches au scho los gange mitem erste Wettkampf mit Bodeturne. Eis Meitli nachem andere hät sini Choreo guet über dä Bode bracht. Es paar Elemänt sind 2mal turnt worde und anderi händ eis vergässe. Aber sie händs alli toll gmacht. Und dänn isches au scho wiiter gange mit Wiitsprung, Sprint 60/80m, Seilisprunge, Fitnessparcour und zum Schluss no Stufebarre. Abglosse hämmer euse Juspotag mit Jägerball und Lininball. Und au Uszeichnige sind debi gsi. Nöd vergässe dörfemer alli Eltere wo eus dä ganzi Tag lut agfüret und motiviert händ. Au händs eus Leiterinne mit Kaffi und Zopf versorgt. Danke vielmals.









Uf Jahresändi, also Dezämber hämmer dä Chlausabig gah. Uf Wunsch vo eusne Meitlis hämmer ä gmeinsami Turnstunde gmacht und wie immer alles ufgstellt für es Affenfangis. Alli händ dä Plausch gah. Und wichtig; dä Samichlaus mitem Schmutzli hät eus bsuecht und eus en Sack mit feine Sache gla. Und au no chli verzellt, was mal besser und was mal schlechter i de Turnstund passiert. Und am Schluss hend Meitli no dörfe ihri glernte Sprüchli ufsege. Miteme feine Gritibänz, Nüssli, Schöggeli und emene feine warme Punsch hämmer dä Abig usklinge lah.



Mir Leiterinne hät no zum Jahresabschluss en Meitliriegeabig gah aber eifach ohni eusi Meitlis. Zerst hämmer es bitzeli Sport gmacht, also Eisstockwerfe, und dänn sind mir zum gmüetliche Teil vom Abig, nämlich zum Znacht übergange.

Und so isch das Jahr wieder umme gsi.

Ich möchte a dere Stell dä Andi, Juli, Alina und Carolin, herzlich Danke für ihri Unterstützig und Geduld.

Mariana Ruiz Diaz